

82 kes baru, 11 lepas pulang dari kawasan berisiko tinggi di Sabah

Malaysiakini

26 September 2020

Kementerian Kesihatan Malaysia (KKM) memaklumkan terdapat 82 kes baru Covid-19 dilaporkan hari ini, dengan 79 daripadanya melibatkan penularan dalam negara.

Daripada jumlah itu, 53 kes melibatkan warganegara manakala baki 26 adalah warga asing.

Sabah kekal menjadi negeri dengan kes baru tertinggi dengan 64 kes, dengan 33 kes daripada kluster Benteng LD dan 25 lagi daripada kluster Bangau-Bangau.

Tiga lagi adalah kes saringan bergejala dan masing-masing satu kes melibatkan petugas kesihatan dari semenanjung di Pintu masuk Antarabangsa, kes Influenza-like Illness (ILI) di Klinik Kesihatan Tawau dan saringan kemasukan ke Hospital Wanita dan Kanak-Kanak Likas.

Bagi negeri lain pula, Negeri Sembilan dan Kuala Lumpur masing-masing

merekodkan tiga kes manakala Selangor dan Terengganu dengan dua kes.

Terdapat satu kes dilaporkan di Pahang, Melaka, Johor, Sarawak dan Labuan.

Sejumlah 11 daripada kes-kes ini dikesan ketika membuat saringan selepas pulang dari "kawasan berisiko tinggi" di Sabah.

Dalam pada itu, sejumlah 89 pesakit pulih daripada wabak Covid-19, menjadikan jumlah keseluruhan kes pulih kepada 9,785 kes.

Terdapat 851 kes yang masih menjalani rawatan dengan lapan daripadanya ditempatkan di Unit Rawatan Rapi (ICU).

Tiada kematian berkaitan Covid-19 yang dilaporkan hari ini.

Copyright © 1999-2012 Mkini Dotcom Sdn. Bhd

Source: <https://www.malaysiakini.com/news/544187>